

176* qua quasi ogni zorno senteno li a Scutari teramoti, siehè i restano molto tepidi et dubiosi.

Da poi disnar, fo Pregadi et leto lettere per do secretari Nicolò di Cabrieli et Alexandro Businelo, *etiam* questa de Dulzigno.

Fu posto, per li Consieri, una confirmation fata per la Signoria a di . . . che per le fatiche ha aute Hironimo di Zoni brexan per andar in Hongaria et *ultimate* in Ciellia a portar letere al capitano de le galle de Barbaria li fo concesso per il Colegio che'l sia corier sopra numerario et intri poi ordinario in loco dil primo vacante, per tanto messeno che la dita concession li sia conservata. Ave: 127, 7, 8.

Fu posto, per li diti, una gratia a Zuan Bortolomio . . . libraro, vol far stampar *in iure* tuti li tratati un drio l'altro secondo le materie, *ut in parte*. Ave: 132, 6, 9.

Fu posto, per li Consieri, Cai di XL, Savi dil Conseio, *absente* sier Alvise Mocenigo el cavalier, et Savii a Terra ferma, excepto sier Marco Antonio Grimani et sier Marco Antonio Corner cazadi, una letera a l'orator nostro in corte, in materia de possessi, come volemo dar el possesso al Coco di Corphù, et perchè le leze nostre non vol uno habbi do vescoadi, perhò quel di Trevixo Soa Beatitudine sarà contento darlo a un nostro prelato che fazi residentia, che nui li daremo il possesso.

Item, che presa questa letera si meterà dar el possesso de Corfù al Coco, et una letera al cardinal Pisani renonci Treviso, si come el si ha oferto de far per sue letere et fece già in man dil Papa, et cussi volemo fazi al presente.

Andò in renga sier Sebastian Foscari el dotor proveditor al Sal, et disse gran mal de Pontefici, et narò el modo come sia absonto l'autorità, et fè un bel discorso concludendo non se sia dar li vescoadi in comenda.

Da poi parlò sier Hironimo da chà da Pexaro l'avogador, dicendo non è sta mai scritto per el Querini electo per questo Conseio vescovo de Trevixo, nè per el Barbarigo electo arzevisepo de Corfù, et per queste letere non se fa menzion de l'horò.

Et li Savi feno lezer una letera voleano scriver per el Querini a Roma, iustificando renonciò la election sua dal capitolo.

Da poi li rispose sier Francesco Soranzo savio a terra ferma, laudando quanto el Colegio vol scriver a Roma per questi possessi.

Andò in renga sier Hironimo Querini et iustificò et narra el tuto de suo fratello electo dal clero,

capitolo et popolo de Trevixo dil 1527 a di . . . avosto, hessendo podestà a Treviso sier Stefano Magno, el qual renonciò a la Signoria tal election, et fo electo de Treviso episcopo per questo Conseio, nè mai è stà a Treviso da quel tempo in quà, ha perso la residentia ch'è canonico, nè mai per lui è sta scritto una minima parola a Roma etc.

Et li Savi fè lezer la letera scrive per lui, et tirar via che è expedita la prima letera ma conza insieme con l'altra, parli al Papa, la qual se manderà con la prima letera et se baloterà insieme, et la letera vol li do terzi de le ballote a esser presa.

Da poi parlò sier Marin Morexini censor el qual voria . . . et li rispose sier Domenego Trivixan el cavalier procurator savio dil Conseio era in setimana, de anni 86, con gran memoria.

Andono le do letere *ut supra*: 40 non sinceri, 54 de no, 103 di le letere; *iterum*: 40 non sinceri, 67 di no, 91 de le letere; non fu preso alcuna cosa, vol li do terzi; l'horà era tarda et fo sagramentà a la porta el Conseio.

A di 8, la matina. Vene in Colegio sier Piero Lando electo podestà a Padoa, et acetò de andar alegramente poi che l'ha visto el voler de la terra che'l vadi.

Di Trento, fo letere di Andrea Rosso secretario, di . . .

Fo parlà de far Pregadi, per expedir li possessi, et non hessendo venuto sier Alvise Mocenigo, terminorono de aspetarlo.

Da poi disnar, fo Collegio de la Signoria con li Savi, per aldir li corectori de le leze; et parlò sier Alvise Gradenigo contra la parte presa, che i dieno prima venir in Pregadi et fo lungo; li rispose sier Lorenzo Bragadin el consier, poi sier Marco Dandolo: hor comenzono a lezer la parte di furanti, et fo parlato assai senza conclusion rimasta.

Di Milano, di l'orator nostro, di . . . fo letere . . .

A di 9, la matina. Se intese di l'armirao veniva do nave, una vien de Cipro, l'altra de Alexandria, et do schirazi con formenti.

Da Ragusi se ave li danari fo mandati per noli-zar nave per mandar a cargar formento.

Di Zara fo letere con le letere dil proveditor di l'armada dil Sasno, di Corfù et dil Zante. Il sumario scriverò qui avanti.

Da poi disnar, fo Collegio de la Signoria con li Cai di X, in la materia di Cesare Podacataro ciprio-